

**Date - 24/09/2026**  
**Time - 7:30 -7:40 Hrs**  
**AKASHVANI AIZAWL**

## **REGIONAL NEWS BULLETIN**

### **HEADLINES (MORNING)**

1. World Health Organisation in India rama boruak thianghlim a tehna Ambient Air Quality Database ah a sang 5 zingah Lunglei leh Kolasib District a tel.
2. Tourism Minister Pu Lalnghinglova Hmar chuan Mizoram mawina leh boruak thianghlim chu khualzin hip turin ramchhunga cheng ten ngaihhlut hmasak a ngaih thu a sawi.
3. President Droupadi Murmu-i chuan thalaite thawhrimna avangin India chu kum 2047 hmain ram changkang a ni thei dawn a ti.
4. India chuan Russia hnen atanga tuialhthei leh gas lei thin ramte laka US-in hrekna a kalpui tur chu a ngai thutak tih a sawi nawn.

<><><>

### **LUNGLEI, KOLASIB RECORD INDIA'S LOWEST PM2.5 LEVELS**

World Health Organisation in India rama boruak thianghlim a tehna Ambient Air Quality Database ah a sang 5 zingah Lunglei leh Kolasib District a tel.

WHO database tichhuah ah hian India rama boruak thianghlimna hmun 5 tarchhuah zingah hian hmarchhak bial vek langin Meghalaya atangin 3 leh Mizoram atangin 2 a ni a, heng zingah hian boruak chhia awm tlem berna chu Meghalaya-a Tura ah leh Mizoram-a Lunglei ah niin Nongstoin in a dawt a, Boruak chhia tichhuak tlem zingah hian Meghalaya-a Dawki leh Mizoram-a Kolasib pawh a tel bawk a ni.

<><><>

### **SEVA SANKALP : MISSION LIFE : LIFESTYLE FOR ENVIRONMENT**

Sorkar laipuiin khawvel pum huapa khawtlang leh mimalte hnena environment humhalh tura hmalakna Mission LiFE (Lifestyle for Environment) chu Mizoramah pawh a taka kalpui mek a ni.

Akashvani News Aizawl zawhna chhangin, Environmental Information, Awareness, Capacity Building and Livelihood Programm (EIACP) co-ordinator Dr. Lalramnghaki Pachuau chuan Mission LiFE (Lifestyle for Environment) hnuaiah hian mipuiten leilung leh boruak (environment) tana khawsakphung tha zawk an lo neih theih nan hma an la thin a ti a. Mizoram chhung hmun hrang hrangah mipui nawlpuiin nunphung ngaia an lo neih tawh hrisel si lo thlak danglam turin mipui an zirtir thin a ti a. Heng zingah hian polythene hman that lohna te, bawlhhlawh hrang hrang- electronic waste leh solid waste thliar hran a paih dan inzirtirna te a tel tih sawiin, mipui bakah school leh college naupang leh nuho pawl te hnenah campaign leh workshop an buatsaih thin a ti a. Heng workshop ah te hian leilung leh boruak tana tha leh him zawk hmanraw siamchhuah te, bawlhhlawh a ngaih tawh tangkai

zawka siam te, loneitute hnena leitha siamchhuah zirtir leh khuai khawi dan te chu mitinte hnenah a remchan dan ang angin zirtirna an pe thin tih a sawi a ni.

Mission LiFE (Lifestyle for Environment) concept hi kum 2021 November ni 1 khan Prime Minister Narendra Modi chuan Glasgow-a COP26 summit ah pulutin, kum 2022 October ni 20 khan Gujarat-ah a hawng a ni.

<><><>

**MZP ASSEMBLY**

Mizoram Zirlai Pawl Assembly vawi 70-na Darlawn ah nizan khan bultan a ni a, naktuk zirtawpni thleng a awh ang.

MZP Assembly vawi 70-na hi Zirlaite leh Nationalism tih thupui hmanga neih niin nizan khan Darkhawpui runah Assembly hawnna leh palai lawmna inkhawm buatsaih a ni a, Thlengtu ah Leader of Opposition Pu Lalthandama Ralte chuan hun hmanpuiin MZP President Dr C. Lalremruata chuan Palai lawmna thu a sawi a ni.

Ruahman dan chuan vawiin hian Darkhawpui runah Vantlang inkhawm buatsaih niin Home Minister Pu K. Sapdanga chuan khuallian niin a hmanpui dawn a, MZP chanchinbu a tlangzarh bawk ang. Chawhnu lamah Agenda hrang hrang sawihoin Rorel inkhawm neih a ni dawn a ni.

<><><>

**NAPOLEON RZ THANGA**

Thawhlejni khan National Film Award vawi 72-na chu puan a ni a, Jury member 11 zingah Mizo filmmaker Pu Napoleon R.Z. Thanga a tel.

New Delhi-a 72 National Film Award puanna hmunah hian ramchhunga Film lama milar tak tak telin film hrang hrang thlan chhuah endik tur mi 11 Jury member (Feature) ah hian Mizo filmmaker Pu Napoleon R.Z. Thanga a tel ve a, nikum Indian Panorama ah kha Jury member alo ni tawh bawk a ni. Kumin National Film Award ah hian film 400 a lut a, chhawng khatna endik hna neih anih hnuah Jury ten film tha thlansa atangin film award hi an thlang a ni. He National Film Award hi kum 2024 chhunga film tihchhuah vek a ni.

<><><>

**PLUCK & PLAY FESTIVAL**

Tourism Minister Pu Lalnghinglova Hmar chuan Mizoram mawina leh boruak thianghlim chu khualzin hip turin ramchhunga cheng ten ngaihhlut hmasak a ngaih thu a sawi.

Mizorama a vawikhatna atana buatsaih Pluck and Pay Festival Tualte-a a hmanpuina ah he thu hi sawiin Tourism Minister chuan Mizoram mawi tak leh boruak thianghlim bakah thing leh mau chu khualzin hiptu ani tiin khualzin tam zawk hip turin ramchhunga cheng ten mahni ram mawina ngaihhlut a pawimawh a ti a, mahni ramchhung hmun hrang hrang tlawh pawh tur leh ram mawina thehdarh tam thei turin mitin te a sawm a ni.

Minister chuan Tualte-a festival neih rualin Chawngtlaiah Block Mela kalpui nghal a ni a ti a, Tourism Department leh Horticulture Department buatsaih Pluck & Pay Festival chu zirtawpni thleng neih tur niin nimin bikah Chawngtlai field-a SHG

stall ten Rs. 2,00,000/- hmuchhuakin, kiwi huan atangin Rs. 18,000/- man lawh leh lei a nih thu a sawi a ni.

*Tourism Department leh Khawzawl DC Office tangkawp buatsaih Pluck and Pay Festival ah hian Mipuite tlawh theih turin Chawngtlai-ah kiwi huan 3, sapthei huan 5 leh tomato huan 5 thlan chhuah niin, Tualte-ah sapthei huan 2, fanghma huan 5, tomato huan 5 leh bean huan 2 thlan chhuah a ni a, mipuiten a thlengtu khuua loneitute huanah kalin thei leh thlai rah chi hrang hrang lovin, an lei thei dawn a. Chawngtlai kawn-ah kuthnathawktute thar chhuah leh siam chhuah zawrhna stall engemawzat a awm a, Zawlkhaw Adventure Club-ten zipline hmanga uai theihna an buatsaih bawk.*

<><><>

## YLA DAY

Lawngtlai District a Tlawmngai Pawl lian ber Young Lai Association Day chuan an din champha vawi 52-na pualin vantlang tan hnathawkin Member te infuihtharna leh intihhlimna hun an buatsaih.

Central YLA chuan nimina YLA Day pual hian a hranin hman dan tur ruahmanna siam lovin Sub. Hqrs leh Branch ten tul leh tha an tih anga hman turin a dah a, Branch hrang hrang te awmn khamin ruai nen a hun hmangte pawh awmin, Branch huamchhung thenfai hnatlangte kovin, Infiamna leh intihhlimna lam hawi ten hun hman a ni a, LADC Sorkara mipawimawh ten hun an hmanpui bakah Central YLA hruiute pawh insem darhin YLA Day hi hmun hrang hrangah an hman.

Young Lai Association hi kum 1974 September 23 khan dintan niin, tun dinhmun ah Sub. Hqrs 10, Branch 123, Member 45,000 vel an awm mek a ni.

<><><>

## 8 YRS OF AYUSHMAN BHARAT

BJP Mizoram State President Dr K Beichhua-a'n sorkar laipui hmalakna hnuaia kum khata cheng nuai 5 thleng damdawi in awm man a thlaw a pek theihna , Ayushman Bharat Pradhan Mantri Jan Arogya Yojana (AB-PMJAY) hamthatna chu Mizorama a dawng thei zawng zawngin an dawn theih nan BJP Mizoram chuan a hma a la zel dawn a ti.

Sorkar laipui hmalakna hnuaia mipui hriselna hmalakna kawnga khawvel a Healthcare Scheme lian ber te zing a mi Ayushman Bharat kum 8 a tlin pualin nimin khan BJP Mizoram State President Dr K Beichhua chuan Aizawla BJP State Office-ah thusawiin, kum 8 liamta chhung khan Ayushman Bharat chuan India rama hriselna dinhmun a thlak danglam nasa hle tih sawiin, hriselna tha, man tlawm leh mi zawng zawng huapzo he Scheme hian a siam a ni a ti a. Tun dinhmunah he PM Healthcare hnuaiah hian ram chhung State leh Union Territory hrang hrangah mi vbc 60 chuanguin hamthatna an hmu tawh a, chhungkaw tam tak ten he Scheme avang hian an damdawiin senso-ah nasa takin sum an hum thei phah chu a lawmawn tak zet a ni a ti.

Dr K Beichhua chuan Ayushman Bharat chu Pu Narendra Modi-a'n mi tumahin sum leh pai harsatna avanga an taksa hriselna enkawl na kawngah harsatna an tawh loh nan a siam a nih thu sawiin, he hmalakna hian India ram hriselna system a ti chak a, mi maktaduai tam tak, a bik takin mirethei leh changhai zawk te nun tidanglamin, an hriselna a tihchak phah hle a ti a. Mizoramah pawh Ayushman

Bharat hamthatna dawng thei zawng zawngin an dawn theih nana BJP Mizoram chuan hma a la zel dawn a, Mizoram mipuite pawh he ruahmanna chungchanga inzirtirna thehdarh tur leh India ram hrisel zawk, chak zawk leh hausa zawk siamna kawnga thawhpui turin a ngen tih a sawi a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### AYURVEDA DAY

Health Minister Lalrinpuii'n mipuite hriselna chawikan chu sorkar ngaihpaawimawh berte zing a mi a ni tih sawiin, tunlai damdawi chauh rinchhan lovin, hnam zia leh ram leilung nena inrem Ayurveda leh AYUSH system-te chu theihtawpa chhawm nun leh chawikan zel an tum tih a sawi a ni.

He thu hi nimina Directorate of AYUSH Mizoram buatsaih Ayurveda Day Aizawl Central YMA Hall-a a hmanpuinaah sawiin, kumin Ayurveda Day thupui, "Ayurveda for a healthier tomorrow" (Hma hun hrisel zawk atan Ayurveda) tih chu tunlai khawvel nen a inmil hle nia a hriat thu sawiin, tunlai khawvelah nunphung inthlak danglam avangin natna hrang hrang- zunthlum, thisen sang, cancer leh lung lam natna a hluar tual tual lai hian, Ayurveda thuken natna laka inven hmasakna, taksa rilru leh leilung inrem taka nunho theihna chu chhanna pawimawh tak a ni a ti a. Damdawi ei ringawt ni loin, chaw ei dan dik te, taksa insawizawi te, rilru hahdamna leh nitin nunphung thianghlim te chu hma hun hrisel neih theih nan a pawimawh hle tih a sawi a ni.

<><><>

#### PRESIDENT

President Droupadi Murmu-i chuan thalaite thawhrimna avangin India chu kum 2047 hmain ram changkang a ni thei dawn a ti. Nimina Maharaja Sayaraja University of Baroda Convocation vawi 75-na Vadodara-a neihah he thu hi sawiin Pi Murmu-i chuan zirna chu ram leh khawtana tangkaia hman anih hunah chauh awmzia a nei ang a ti. President chuan technology lama hmasawanna chu kawng tinrengah a thleng mek a ti a. Vawiina harsatna thleng mek tam tak hi kil hrang hrang atanga zirna hmanga chinfel theih a ni a ti a. Tunlai khawvela hmeichhiate zirna leh thil dangah an tel tam tial tial chu lawmawm a tih thu a sawi a ni.

President Droupadi Murmu-i hian zirlai hlawhtlinna chang 12600 te hnenah degree a hlan a. Heng zingah hian gold medal 201 zirlai 160 hnenah a hlan bawk a ni.

<><><>

#### INDIA - US

India chuan Russia hnen atanga tuialhthei leh gas lei thin ramte laka US hrekna a kalpui tur chu a ngai thutak tih a sawinawn. Nimin

khan External Affairs Minister S.Jaishankar chuan US Secretary of State Marco Rubio nen UN General Assembly session karlaka an inkawmnaah he thu hi a sawi a. Russia and Iran Act an siam chungchang chu a ngai thutak hle tih Pu Jaishankar-a chuan a sawi a. Hruaitu pahnihte hian India-US inkara inlaichinna leh Gulf leh Ukraine chungchang an sawidun bawk a ni.

Puan tawh angin US President Donald Trump-a chuan kar hmasa khan Sanctioning Russia and Iran Act dan thar chu pawm a. Russia hnen atanga tuialhthei leh gas lei thin ramte lakah US nena an insumdawnnaah zaa za chhiah lak a ni dawn a ni. Hetihlai hian New Delhi chuan India sum leh pai dinhmun thatna tur leh hlawkna tur berin hma a la dawn tih a sawi a ni.

<><><>